

## ԴՐԱՄԱՇՆՈՐՀԻ ՏՐԱՄԱԴՐՄԱՆ ՊԱՅՄԱՆԱԳԻՐ N 72

ք. Երևան

«30» «01» 2019 թ.

Հայաստանի Հանրապետության մշակույթի նախարարությունը (այսուհետ՝ Պատվիրատու)՝ ի դեմս նախարարության կանոնադրության հիման վրա գլխավոր քարտուղար՝ Ս. Մուրադյանի, մի կողմից, և «Հայաստանի ազգային կինոկենտրոն» պետական ոչ առևտրային կազմակերպությունը (այսուհետ՝ Կատարող)՝ ի դեմս կազմակերպության կանոնադրության հիման վրա գործող տնօրենի պաշտոնակատար Շ. Միրզախանյանի, մյուս կողմից, կնքեցին սույն պայմանագիրը (այսուհետ նաև՝ Պայմանագիր) հետևյալի մասին.

### 1. ՊԱՅՄԱՆԱԳՐԻ ԱՌԱՐԿԱՆ

1.1. Պատվիրատուն հանձնարարում է, իսկ Կատարողը պարտավորվում է Պայմանագրով սահմանված վճարի դիմաց Պայմանագրով սահմանված կարգով ու ժամկետում իրականացնել Պայմանագրի 2.3-րդ կետով և իր կանոնադրությամբ նախատեսված ազգային կինոծրագրերի իրականացում և այլ գործառույթներ (այսուհետ՝ աշխատանք)՝ համաձայն Պայմանագրի անբաժանելի մաս կազմող՝

1.1.1. ազգային կինոծրագրերի իրականացման կանխատեսվող ֆինանսական և ոչ ֆինանսական ցուցանիշների՝ հավելված N 1,

1.1.2. ֆինանսական պարտավորությունների կատարման ժամանակացույցի՝ հավելված N 2,

1.1.3. 2019 թվականի նախատեսվող հոբեյանների ցանկի՝ հավելված N 3,

1.1.4. ոչ ֆինանսական ցուցանիշների կատարման վերաբերյալ հաշվետվության՝ հավելված N 4:

1.2. Սույն պայմանագրով նախատեսված պարտավորությունների կատարման դիմաց վճարումը կատարվում է դրամաշնորհի հատկացման ձևով՝ «Հայաստանի Հանրապետության 2019 թվականի պետական բյուջեի մասին» Հայաստանի Հանրապետության օրենքի N 1 հավելվածի N 2 աղյուսակի «1056. Կինեմատոգրաֆիայի ծրագրի» «11003. Ազգային կինոծրագրերի իրականացում» միջոցառման համար նախատեսված բյուջետային հատկացումների սահմաններում:

### 2. ԿՈՂՄԵՐԻ ԻՐԱՎՈՒՆՔՆԵՐՆ ՈՒ ՊԱՐՏԱԿԱՆՈՒԹՅՈՒՆՆԵՐԸ

2.1.1. Սույն պայմանագրի պահանջներին համապատասխան՝ Կատարողից ընդունել պատշաճ ձևով ու կարգով կատարված աշխատանքները և հաշվետվությունները:

2.1.2. Իր և Կատարողի կանոնադրություններով սահմանված իրավասությունների շրջանակներում Կատարողին ցուցաբերել մեթոդական և կազմակերպական օգնություն:

#### 2.2. Պատվիրատուն իրավունք ունի՝

2.2.1. Ցանկացած ժամանակ (պարբերաբար), առանց որևէ սահմանափակումների, ստուգել Կատարողի կողմից սույն պայմանագրի կատարման ընթացքը և որակը՝ առանց միջամտելու

վերջինիս կանոնադրական գործունեությանը (բացառությամբ օրենքով և Կատարողի կանոնադրությամբ սահմանված դեպքերի):

2.2.2. Կատարողից պարբերաբար պահանջել ու ստանալ տեղեկույթ սույն պայմանագրի կատարման ընթացքի մասին:

2.2.3. Իր իրավասությունների սահմաններում կասեցնել Կատարողի կողմից ոչ պատշաճ ձևով կամ կարգով կատարվող աշխատանքները:

2.2.4. Կատարողից պահանջել առանց լրացուցիչ վճարի վերստին կատարել ոչ պատշաճ ձևով կամ կարգով կատարված աշխատանքները:

2.2.5. Վերահսկել սույն պայմանագրով Կատարողին հատկացված դրամական միջոցների նպատակային օգտագործումը:

2.2.6. Պայմանագրի 2.3-րդ կետով նախատեսված պարտավորությունները վերանայել (փոփոխություն կատարել) նախորդ տարվա հաշվետվությունների արդյունքների հիման վրա:

### **2.3. Կատարողը պարտավոր է՝**

2.3.1. Ժամանակին, պատշաճ ձևով ու կարգով կատարել սույն պայմանագրի 1.1-ին կետով նախատեսված աշխատանքները, դրանց հաշվառումը և գրանցումը՝ Հայաստանի Հանրապետության օրենսդրության և իրավական ակտերով նախատեսված ձևով ու կարգով:

2.3.2. Ստեղծել կինոարվեստի բնագավառում երկրի համար հասարակական, քաղաքական, մշակութային ու գեղարվեստական կարևորություն ունեցող, ազգային գաղափարախոսությունն ու արդիական խնդիրներ արտահայտող խաղարկային, մուլտիպլիկացիոն լիամետրաժ, կարճամետրաժ, դեբյուտային կինոնկարներ՝ նախապատվությունը տալով գաղափարագեղարվեստական բարձրարժեք հայտերին:

2.3.3. Ստեղծել մանուկների և պատանիների նախասիրություններին, հետաքրքրություններին, քաղաքացիական գիտակցությանը, հայրենասիրության ձևավորմանը նպաստող խաղարկային, մուլտիպլիկացիոն կինոնկարներ:

2.3.4. Մինչև ֆիլմերի հրապարակային ցուցադրումը ապահովել դրանց փակ դիտումը գեղարվեստական կամ ստեղծագործական-արտադրական խորհրդի և Պատվիրատուի ներկայացուցիչների մասնակցությամբ:

2.3.5. Մինչև ֆիլմերի հրապարակային ցուցադրումը Պատվիրատուի հետ համաձայնեցնել գովազդային նյութերը (ազդագիր, հեռուստառադիոգովազդ և այլն):

2.3.6. Իրականացնել առնվազն 12 միջոցառում ՀՀ մարզերում և ԱՀ-ում՝ «Մշակութային մարզ» ծրագրի շրջանակներում:

2.3.7. Իրականացնել կինոցուցադրություններ՝ նվիրված Հովհաննես Թումանյանի 150-ամյա և Կոմիտասի 150-ամյա հոբելյաններին:

2.3.8. Մարտ-ապրիլ ամիսներին իրականացնել կինոցուցադրություններ և միջոցառումներ Ֆրանկոֆոնիայի երկամսյակի շրջանակներում:

2.3.9. Ապահովել ընթացիկ տարում ոլորտային 8 հոբելյանական միջոցառումների կազմակերպումն ու իրականացումը՝ ըստ Պատվիրատուի կողմից ներկայացված ցանկի՝ համաձայն (Հավելված N 3):

2.3.10. Իրականացնել կինոցուցադրություններ՝ ՀՀ զինված ուժերի համակարգում և քրեակատարողական հիմնարկներում:

2.3.11. Իր գործունեության հանրահռչակման նպատակով արտաբյուջեի հաշվին ապահովել վճարովի գովազդ՝ գովազդային, տեղեկատու և միջոցառումներ լուսաբանող կայքէջերում, սոցիալական հարթակներում (մասնավորապես՝ Facebook, Instagram):

2.3.12. Իրականացնել միջազգային կինոկազմակերպությունների հետ համատեղ կինոնախագծեր՝ մասնակից կինոարտադրողների պարտավորությունները երաշխավորող պայմանագրերի առկայության դեպքում:

2.3.13. Պատվիրատուին ներկայացնել առաջարկություններ՝ օտարերկրյա պետություններում հայկական կինոյի օրերին, շաբաթներին, միջազգային կինոփառատոներին, կինոշուկաներին մասնակցելու վերաբերյալ:

2.3.14. Հայաստանում և նրա սահմաններից դուրս հայկական կինոյի օրերին, շաբաթներին, միջազգային կինոփառատոներին, կինոշուկաներին ներկայացվող ֆիլմերի մասնակցության նպատակով ապահովել՝

1) նեգատիվներից կինոժապավենների պատճենների արտատպումը միջազգային չափանիշներին համապատասխան.

2) հայկական ֆիլմերի մոնտաժային թերթիկների և դրանց թարգմանության պատրաստումը (մի քանի լեզուներով).

3) նեգատիվներից լուսանկարների, ազդագրերի պատրաստումը:

2.3.15. Ներկայացնել տեղեկատվություն ֆիլմերի արտադրության յուրաքանչյուր փուլի և ավարտի վերաբերյալ՝ համապատասխան փաստաթղթերով, գեղարվեստական կամ ստեղծագործական-արտադրական խորհրդի մասնագիտական եզրակացությամբ:

2.3.16. Պատվիրատուի պահանջով ներկայացնել սույն պայմանագրի կատարմանը վերաբերող բոլոր տեսակի փաստաթղթերը (ֆինանսական և բովանդակային հաշվետվություն): Բովանդակային հաշվետվության հետ ներկայացնել իրականացված միջոցառումների մասին համապատասխան նյութեր (լուսանկարներ, լուգոտիպ կամ այլ գրաֆիկական պատկեր կամ ազդագրեր), հրավիրատոմսեր, մամուլի հրապարակումներ և այլ տեղեկատվական նյութեր՝ էլեկտրոնային կրիչներով:

2.3.17. Ընդունել Պատվիրատուի և այլ ընկերությունների միջև կնքված պայմանագրերի շրջանակներում արտադրված կինոնկարները (խաղարկային, մուլտիպլիկացիոն լիամետրաժ, կարճամետրաժ, դեբյուտային) և դրանց վերաբերյալ Պատվիրատուին ներկայացնել գեղարվեստական կամ ստեղծագործական-արտադրական խորհրդի մասնագիտական եզրակացությունը:

2.3.18. Սույն պայմանագրով սահմանված պարտավորություններն իրականացնել Պատվիրատուի կողմից հաստատված մեթոդական ցուցումների, հրահանգների և այլ իրավական ակտերի (փաստաթղթերի) պահանջներին համապատասխան:

2.3.19. Պատվիրատուին անհապաղ հայտնել սույն պայմանագրի կատարման համար առաջացած խոչընդոտների մասին և միաժամանակ ձեռնարկել իր կողմից հնարավոր բոլոր միջոցները՝ այդ խոչընդոտներն անհապաղ վերացնելու համար:

2.3.20. Հայաստանի Հանրապետության օրենսդրությամբ և իրավական ակտերով նախատեսված ձևով ու կարգով Պատվիրատուին ներկայացնել եռամսյակային ու տարեկան հաշվետվություններ:

2.3.21. Պատվիրատուի հետ նախապես համաձայնեցնել նրա իրավասությանը վերապահված հարցերի լուծման տարբերակները:

2.3.22. Պայմանագրից բխող աշխատանքներն իրականացնել՝ ապահովելով Պայմանագրի պարտադիր պահանջները:

2.3.23. Պայմանագրից բխող աշխատանքները չկատարելու դեպքում վերադարձնել Պատվիրատուի կողմից տրամադրված գումարը և վճարել տուգանք սույն պայմանագրի 3.1-ին կետում նախատեսված գումարի 1.0 (մեկ) տոկոսի չափով:

2.3.24. Հրապարակել Պատվիրատուի անունը, իսկ համաֆինանսավորման դեպքում տրամադրել ամբողջական տեղեկատվություն՝ ծրագրին աջակցող կազմակերպության, ֆինանսավորման չափի և վերջինիս հետ ձեռք բերված այլ պայմանավորվածությունների մասին:

2.3.25. Սույն Պայմանագրի 1.1-ին կետով նախատեսված աշխատանքների կատարման գործընթացը կազմակերպել «Գնումների մասին» ՀՀ օրենսդրությամբ սահմանված կարգով:

2.3.26. Պատվիրատուին ներկայացնել եռամսյակային ու տարեկան հաշվետվություններ համաձայն ՀՀ ֆինանսների նախարարի 2013 թվականի փետրվարի 4-ի N 104-Ն և 2015 թվականի ապրիլի 1-ի N 176-Ն հրամանների, ինչպես նաև ՀՀ օրենսդրությամբ և իրավական այլ ակտերով նախատեսված ձևով ու կարգով:

2.3.27. Սույն Պայմանագիրն ուժի մեջ մտնելուց հետո, մինչև 2019 թվականի փետրվարի 20-ը Պատվիրատուի հաստատմանը ներկայացնել Կատարողի ֆինանսատնտեսական գործունեության նախահաշիվը՝ համապատասխան հիմնավորումներով: Նախահաշվի յուրաքանչյուր ծախսային ուղղության մեջ կատարվող փոփոխությունը նախապես՝ մինչև փաստացի ծախսերի կատարումը համաձայնեցնել Պատվիրատուի հետ: Նախահաշվում փոփոխությունների ներկայացման առաջարկի վերջնաժամկետն է 2019 թվականի դեկտեմբերի 20-ը: Աշխատանքների իրականացման արդյուքում առաջացած տնտեսումները (խնայողությունները) ենթակա են վերադարձման ՀՀ պատական բյուջե՝ ոչ ուշ, քան մինչև 2019 թ. դեկտեմբերի 25-ը:

#### **2.4. Կատարողն իրավունք ունի՝**

2.4.1. Պատվիրատուից պահանջել ընդունել սույն պայմանագրի 1.1-ին կետում նշված և Կատարողի կողմից պատշաճ ձևով ու կարգով կատարված աշխատանքները:

2.4.2. Պատվիրատուից պահանջել վերացնել Կատարողի գործողություններից (անգործությունից) անկախ՝ Պատվիրատուի մեղքով սույն պայմանագրի կատարման համար առաջացած խոչընդոտները կամ վերանայել սույն պայմանագրի պայմանները:

2.4.3. Վաղաժամկետ լուծել սույն պայմանագիրը՝ սույն պայմանագրով կամ Հայաստանի Հանրապետության օրենսդրությամբ սահմանված կարգով և դեպքերում:

### **3. ՊԱՅՄԱՆԱԳՐԻ ԳԻՆԸ ԵՎ ՎՃԱՐՈՒՄՆԵՐԻ ԿԱՐԳԸ**

3.1. Սույն պայմանագրի 1.1-ին կետում նշված աշխատանքների ընդհանուր արժեքը սահմանված է **160148.8** (մեկ հարյուր վաթսուն միլիոն մեկ հարյուր քառասունութ հազար ութ հարյուր) հազար դրամ՝ ներառյալ հարկերը, տուրքերը և պարտադիր այլ վճարները: Այդ

գումարի չափը կարող է փոփոխվել սույն պայմանագրով կամ Հայաստանի Հանրապետության օրենսդրությամբ սահմանված դեպքերում ու կարգով:

3.2. Սույն պայմանագրի 3.1-ին կետում նշված գումարը Պատվիրատուն պետք է վճարի Կատարողին սույն պայմանագրի N 2 հավելվածով սահմանված ժամկետներում՝ Կատարողի՝ սույն պայմանագրում նշված գանձապետական հաշվեհամարին փոխանցումներ կատարելու եղանակով:

3.3. Սույն պայմանագրով կատարողի կողմից աշխատանքների սահմանված ցուցանիշներն ու պայմանները խախտելու դեպքում Պատվիրատուն իրավունք ունի վերանայել սույն պայմանագրի 3.1-ին կետում նշված գումարի չափը և դրա վճարման ժամանակացույցը:

3.4. Համաձայն «ՀՀ 2019 թվականի պետական բյուջեի մասին» ՀՀ օրենքի 7-րդ հոդվածի 22-րդ կետի հաշվարկված ԱԱՀ-ի գծով լրացուցիչ հատկացումները չեն կարող ուղղվել այլ նպատակների և չօգտագործված գումարները 2019 թվականի ընթացքում ենթակա են վերադարձման ՀՀ պետական բյուջե:

#### **4. ՊԱՅՄԱՆԱԳՐԻ ԺԱՄԿԵՏԸ**

4.1. Սույն պայմանագիրը ուժի մեջ է մտնում կողմերի ստորագրության պահից և գործում է մինչև 2020 թվականի հունվարի 31-ը:

4.2. Սույն Պայմանագրի գործողությունը տարածվում է 2019 թ. հունվարի 1-ից հետո ծագած հարաբերությունների վրա:

#### **5. ԱՇԽԱՏԱՆՔՆԵՐԻ ԸՆԴՈՒՆՄԱՆ ԿԱՐԳԸ**

5.1. Սույն պայմանագրի 1.1-ին կետում նշված և կատարված աշխատանքները Կատարողի կողմից ներկայացվում են Պատվիրատուի ընդունմանը ոչ ուշ, քան յուրաքանչյուր եռամսյակին հաջորդող ամսվա 10-ը: (հավելված N 4):

#### **6. ԿՈՂՄԵՐԻ ՊԱՏԱՍԽԱՆԱՏՎՈՒԹՅՈՒՆԸ**

6.1. Սույն պայմանագրով նախատեսված պարտավորությունները կողմերը պարտավոր են կատարել պատշաճ և սահմանված ժամկետներում: Դրանք ոչ պատշաճ կամ ժամկետանց կատարելու, չկատարելու կամ կատարելուց խուսափելու դեպքում, ինչպես նաև իրենց գործողություններով կամ անգործությամբ սույն պայմանագրի կատարման համար խոչընդոտներ ստեղծելու, մյուս կողմին վնաս պատճառելու կամ կանխատեսվող եկամուտներից զրկելու համար կողմերից յուրաքանչյուրը կրում է պատասխանատվություն մյուս կողմին պատճառած վնասների և բաց թողնված օգուտների լրիվ ծավալով՝ Հայաստանի Հանրապետության օրենսդրությամբ սահմանված կարգով:

6.2. Սույն պայմանագիրը կարող է վաղաժամկետ լուծվել կողմերից որևէ մեկի նախաձեռնությամբ՝ մյուս կողմի՝ սույն պայմանագրի պայմանները խախտելու դեպքում: Այդ ժամանակ նախաձեռնող կողմը պետք է ստանա վնասների և բաց թողնված /չստացված/ եկամուտների լրիվ չափով փոխհատուցում:

6.3. Սույն պայմանագիրը վաղաժամկետ դադարեցնելը կամ լուծելը կողմերից որևէ մեկի համար այն կատարել շարունակելը աննպատակահարմար լինելու դեպքում կամ այլ պատճառաբանությամբ չի թույլատրվում: Նման դեպքում մյուս կողմն իրավունք ունի կամ ստանալ սույն պայմանագրի 6.1-ին կետով նախատեսված լրիվ փոխհատուցումը, կամ պահանջել սույն պայմանագրի հարկադիր կատարումը:

6.4. Սույն պայմանագրով սահմանված ժամկետները Կատարողի կողմից չպահպանվելու դեպքում վերջինս, եթե Պատվիրատուին չի ներկայացրել դրա վերաբերյալ հիմնավոր բացատրություն, վճարում է տույժ Պայմանագրի գնի 0,01 (մեկ հարյուրերորդական) տոկոսի չափով՝ ուշացման յուրաքանչյուր օրացուցային օրվա համար:

6.5. Սույն պայմանագրով նախատեսված պարտավորությունները չկատարելու կամ ոչ պատշաճ կատարելու դեպքում Կատարողը, եթե Պատվիրատուին չի ներկայացրել դրա վերաբերյալ հիմնավոր բացատրություն, վճարում է տուգանք չկատարված աշխատանքի 0.5 (հինգ տասնորդական) տոկոսի չափով:

## 7. ԱՅԼ ՊԱՅՄԱՆՆԵՐ

7.1. Սույն պայմանագրով պարտավորություններն ամբողջությամբ կամ մասնակիորեն չկատարելու համար կողմերն ազատվում են պատասխանատվությունից, եթե դա եղել է անհաղթահարելի ուժի ազդեցության հետևանքով, որը ծագել է սույն պայմանագիրը կնքելուց հետո, և որը կողմերը չէին կարող կանխատեսել կամ կանխարգելել: Այդպիսի իրավիճակներ են երկրաշարժը, ջրհեղեղը, հրդեհը, պատերազմը, ռազմական և արտակարգ դրություն հայտարարելը, քաղաքական հուզումները, գործադուլները, հաղորդակցության միջոցների աշխատանքի դադարեցումը, պետական մարմինների ակտերը և այլն, որոնք անհնարին են դարձնում սույն պայմանագրով պարտավորությունների կատարումը:

7.2. Սույն պայմանագրից ծագած կողմի վճարային պարտավորությունը չի կարող դադարել այլ պայմանագրից ծագած հակընդդեմ պարտավորության հաշվանցով՝ առանց կողմերի գրավոր և կնիքով հաստատված համաձայնության:

7.3. Սույն պայմանագրում փոփոխություններ և լրացումներ կարող են կատարվել միայն Կողմերի երկկողմ գրավոր համաձայնություն կազմելու միջոցով:

7.4. Սույն պայմանագրի կապակցությամբ ծագած վեճերը լուծվում են բանակցությունների միջոցով: Համաձայնություն ձեռք չբերվելու դեպքում վեճերը լուծվում են դատական կարգով:




7.5. Սույն պայմանագիրը կնքելիս կողմերը հաստատում են, որ դրանով իրենց շահերը և օրինական իրավունքները ոչ մի կերպ չեն խախտվում, կամ սահմանափակվում:

7.6. Սույն պայմանագիրը կազմված է ---- էջից (ներառյալ հավելվածները), կնքվում է երեք օրինակից, որոնք ունեն հավասարազոր իրավաբանական ուժ:

**9. ՏԵՂԵԿՈՒԹՅՈՒՆՆԵՐ ԿՈՂՄԵՐԻ ՄԱՍԻՆ**

**Պատվիրատու՝** Հայաստանի Հանրապետության մշակույթի նախարարություն, հասցեն՝ 0010, Երևան, Կառավարական շենք N 2, հաշիվ N 900011031151, Հայաստանի Հանրապետության ֆինանսների նախարարության գործառնական վարչություն, հեռ.՝ 011-52-93-49:

**Կատարող՝** «Հայաստանի ազգային կինոկենտրոն» պետական ոչ առևտրային կազմակերպություն, գրանցման հասցեն՝ Երևան, Տերյան 3 ա, ՀՎՀՀ՝ 01203271, հաշիվ N 900018001744, Հայաստանի Հանրապետության ֆինանսների նախարարության գործառնական վարչություն, հեռ.՝ 50-02-30:

<b>Պատվիրատու՝</b>	<b>Կատարող՝</b>
Նախարարության գլխավոր քարտուղար՝  Կ.Տ.  Ս. ՄՈՒՐԱՂՅԱՆ 	«Հայաստանի ազգային կինոկենտրոն» ՊՈԱԿ-ի տնօրենի պաշտոնակատար՝  Կ.Տ.  Շ. ՄԻՐԶԱԽԱՆՅԱՆ 